

Հաստատված է՝  
Հայաստանի Հանրապետության  
փաստաբանների պալատի խորհրդի  
11.04.2016թ. թիվ 10/4-Լ որոշմամբ



խորհրդի նախագահ՝  
Արմա Զորիարյան

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ՓՈՍՏԱԲԱՆՆԵՐԻ ՊԱԼԱՏԻ ԽՈՐՀՐԴԻՆ ԱՌԸՆԹԵՐ  
ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ**

**Կ Ա Ն Ո Ն Ա Կ Ա Ր Գ**

**ՆՈՐ ԽՄԲԱԳՐՈՒԹՅԱՄԲ**

## I. ԸՆԴՀԱՆՈՒՐ ԴՐՈՒՅԹՆԵՐ

1. Հայաստանի Հանրապետության փաստաբանների պալատի (**այսուհետ՝ Պալատ**) խորհրդին առընթեր գիտավերլուծական կենտրոնի (**այսուհետ՝ Գիտավերլուծական կենտրոն**) կանոնակարգը սահմանում է Գիտավերլուծական կենտրոնի գործունեության կարգը, ինչպես նաև համակարգողին և փորձագետներին նշանակելու կամ ազատելու հետ կապված հարաբերությունները:
2. Գիտավերլուծական կենտրոնը Պալատի խորհրդին առընթեր խորհրդակցական մարմին է և չի հանդիսանում Պալատի ստորաբաժանում:

## II. ԳԻՏԱՎԵՐԼՈՒԾԱԿԱՆ ԿԵՆՏՐՈՆԸ

3. Գիտավերլուծական կենտրոնը՝
  - Հայաստանի Հանրապետության սահմանադրական դատարանի կողմից քննության ընդունված և Պալատին տրամադրված գործերով ներկայացնում է երրորդ կողմի կարծիք (amicus curiae).
  - Մարդու իրավունքների եվրոպական դատարանում կամ այլ միջազգային դատարանում քննվող գործերով, ըստ անհրաժեշտության, ներկայացնում է երրորդ կողմի կարծիք (amicus curiae).
  - Պալատի նախագահի կամ խորհրդի առաջարկով ներկայացնում է որևէ իրավական ակտի կամ իրավական ակտի նախագծի վերաբերյալ գրավոր կարծիք (մեկնաբանություն).
  - Պալատի նախագահի կամ խորհրդի առաջարկով ներկայացնում է փաստաբանական գործունեությանն առնչվող իրավական բնույթի հարցի վերաբերյալ գրավոր կարծիք (մեկնաբանություն).
  - Պալատի նախագահի կամ խորհրդի առաջարկով մշակում է գիտամեթոդական ձեռնարկներ:

## III. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ԱՇԽԱՏԱՆՔՆԵՐԻ ԿԱԶՄԱԿԵՐՊՈՒՄԸ

4. Գիտավերլուծական կենտրոնի աշխատանքները համակարգում է Գիտավերլուծական կենտրոնի համակարգողը:
5. Գիտավերլուծական կենտրոնի համակարգողին անորոշ ժամկետով նշանակում է Պալատի խորհուրդը՝ Պալատի նախագահի ներկայացմամբ:  
(կեփը փոփոխվել է 23.03.2021թ. թիվ 5/16-Լ որոշմամբ)
6. Գիտավերլուծական կենտրոնի աշխատանքներին մասնակցելու համար կարող են հրավիրվել իրավունքի տարբեր բնագավառների մասնագետներ, փաստաբաններ, այլ իրավաբաններ և

իրավապաշտպաններ (**այսուհետ՝ փորձագետներ**), որոնք կարող են կատարած աշխատանքի համար վարձատրվել Գիտավերլուծական կենտրոնի համար ստացված ֆինանսական միջոցներից:

7. Գիտավերլուծական կենտրոնի գործունեության հետ կապված ծախսերը (այդ թվում՝ համակարգողի վարձատրությունը) կատարվում են Պալատի բյուջեի հաշվին: Գիտավերլուծական կենտրոնի աշխատանքների ֆինանսավորման համար Պալատը կարող է ստանալ դրամաշնորհներ, նվիրատվություններ և այլ՝ օրենքով չարգելված ֆինանսական միջոցներ:
8. Գիտավերլուծական կենտրոնի կարծիքը կարող է ուղարկվել խորհրդի անդամներին էլեկտրոնային փոստով, եթե Պալատի աշխատակազմը գտնում է, որ կարծիքը վերանայման կամ քննարկման կարիք ունի: Գիտավերլուծական կենտրոնի կարծիքը խորհրդի անդամներին ուղարկելու դեպքում, եթե եռօրյա ժամկետում խորհրդի անդամների կողմից առաջարկ չի ներկայացվում հարցը խորհրդի օրակարգում քննարկելու վերաբերյալ, ապա կարծիքը Պալատի աշխատակազմը կարող է ուղարկել հասցեատիրոջը: Խորհրդի առնվազն մեկ անդամի կողմից հարցը խորհրդի նիստում քննարկելու առաջարկի դեպքում, կարծիքը ներկայացվում է խորհրդի քննարկմանը: Կարծիքի նախագիծը հաստատվում կամ փոփոխվում է խորհրդի կողմից:  
*(կեպը փոփոխվել է 17.04.2019թ. թիվ 7/10-Լ, 23.03.2021թ. թիվ 5/16-Լ որոշումներով)*
9. Գիտավերլուծական կենտրոնը կարող է ինչպես Հայաստանի Հանրապետությունում, այնպես էլ այլ երկրներում գործող հասարակական, գիտական, գիտահետազոտական կազմակերպությունների, փորձագիտական կենտրոնների, ուսումնական հաստատությունների, փաստաբանական կառույցների և դրանց համապատասխան ստորաբաժանումների հետ կապեր հաստատել՝ համագործակցության նպատակով:

#### **IV. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ՀԱՄԱԿԱՐԳՈՂԻ ԼԻԱԶՈՐՈՒԹՅՈՒՆՆԵՐԸ**

10. Գիտավերլուծական կենտրոնի համակարգողը՝
  - կազմակերպում է փորձագետների միջև աշխատանքի բաժանումը և համակարգում է նրանց աշխատանքները.
  - ապահովում է Գիտավերլուծական կենտրոնին հասցեագրված գրությունների (հանձնարարությունների, առաջարկությունների) ընթացքը.
  - ներկայացնում է Գիտավերլուծական կենտրոնի գործունեության տարեկան հաշվետվությունը.
  - ստորագրում է Գիտավերլուծական կենտրոնի անունից ելքագրվող փաստաթղթերը.
  - իրականացնում է սույն կանոնակարգով նախատեսված այլ լիազորություններ:

## **V. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ՀԱՄԱԿԱՐԳՈՂԻ ԼԻԱԶՈՐՈՒԹՅՈՒՆՆԵՐԻ ԴԱԴԱՐԵՑՄԱՆ ԿԱՐԳԸ**

11. Գիտավերլուծական կենտրոնի համակարգողի լիազորությունները ցանկացած ժամանակ կարող են դադարեցվել Պալատի նախագահի կամ Խորհրդի նախաձեռնությամբ, ինչպես նաև համակարգողի կողմից այդ մասին Պալատի նախագահին գրավոր դիմում ներկայացնելու դեպքում:  
*(կեպը փոփոխվել է 23.03.2021թ. թիվ 5/16-L որոշմամբ)*
12. Համակարգողի լիազորությունները համարվում են դադարած Պալատի Խորհրդի որոշման կայացման պահից, իսկ սույն Կանոնակարգի 11-րդ կետում նշված դեպքում՝ դիմում ներկայացնելու հաջորդ օրվանից:

## **VI. ԳԻՏԱՎԵՐԼՈՒԾԱԿԱՆ ԿԵՆՏՐՈՆԻ ԿԱԶՄԸ**

13. Գիտավերլուծական կենտրոնն իր աշխատանքները կազմակերպում է մշտական կամ ժամանակավոր փորձագետների ներգրավման միջոցով:
14. Փորձագետներին նշանակում կամ ազատում է Պալատի նախագահը:

## **VII. ԵԶՐԱՓԱԿԻՉ ԴՐՈՒՅԹՆԵՐ**

15. Սույն կանոնակարգն ուժի մեջ է մտնում 2016 թվականի ապրիլի 12-ից:
16. *(կեպն ուժը կորցրել է 23.03.2021թ. թիվ 5/16-L որոշմամբ):*
17. *(կեպն ուժը կորցրել է 23.03.2021թ. թիվ 5/16-L որոշմամբ):*
18. Սույն կանոնակարգում փոփոխություններ և (կամ) լրացումներ կարող են կատարվել միայն Պալատի Խորհրդի որոշմամբ: